

48 murid berusia lapan tahun 'masuk kampus'

# Program Permata Insan USIM

SEREMBAN 21 Dis. – Seramai 48 pelajar berusia lapan tahun kini memasuki 'kampus' Universiti Sains Islam Malaysia (USIM), Nilai untuk mengikuti Program Permata Insan bermula 11 Disember lalu hingga Jumaat ini.

Program tersebut merupakan pendekatan untuk mengenal pasti pelajar pintar seawal mungkin supaya potensi dan kebolehan mereka dapat dibangunkan secara menyeluruh ke tahap yang optimum.

Unit Komunikasi Korporat USIM dalam satu kenyataannya hari ini memberitahu, program yang dijalankan itu juga memberi penekanan terhadap aspek penyediaan dan pembangunan sistem sokongan termasuk bimbingan kepada ibu bapa bagi membantu perkembangan holistik pelajar.

Bersempena dengan perkhemahan ini, isteri Perdana Menteri, Datin Seri Rosmah Mansor yang juga Penaung Program Permata Negara dijangka mengadakan lawatan kerja ke program itu esok bermula pukul 9.30 pagi bagi menyatakan sokongan kepada para peserta.

Tambah kenyataan itu, dengan tema, 'Menjana Cendekiawan Islam', diharap dapat menjadi satu langkah yang proaktif bagi membentuk generasi yang celik ilmu duniawi dan ukhrawi, selain mengembalikan zaman kegemilangan ulama silam.

Usaha ini dilihat sebagai langkah permulaan bagi negara untuk melahirkan kanak-kanak generasi al-Quran yang bakal menjadi tokoh ilmuwan Islam serta mampu membangunkan metodologi baru dalam menaf-

sirkan al-Quran dan sunnah.

Program di USIM ini akan menjadi satu titik tolak kepada aspirasi negara untuk melahirkan lebih ramai teknokrat dan profesional Islam pada masa hadapan.

Menurut kenyataan itu lagi, pelajar yang terpilih telah menjalani siri ujian pemilihan khas dan ia telah dibuat menerusi proses saringan Ujian Kecerdasan Universiti Kebangsaan Malaysia (UKM) I yang berlangsung sepanjang bulan Mac hingga Mei lalu.

Mereka yang berjaya melepasi tahap kecerdasan UKM I, disaring di peringkat seterusnya melalui Ujian Kecerdasan UKM II dan Ujian USIM I bagi melihat kecenderungan mereka dalam pengajian agama di samping menilai sahsiah pelajar dan sokongan keluarga.

Menerusi bengkel dan aktiviti perkhemahan, pelajar juga perlu menjalani proses pembelajaran, pengukuhan dan penilaian berterusan di lokasi strategik dengan melalui beberapa fasa dari usia lapan tahun hingga ke peringkat pendidikan menengah.

Potensi dan prestasi pelajar akan dikembangkan dengan berpandukan modul pembelajaran yang disediakan oleh Akademi Permata Insan, USIM.

Akademi ini terdiri daripada ahli-ahli profesional mengikut kepakaran tertentu dari kalangan pensyarah, kaunselor, guru, serta pelajar USIM peringkat sarjana atau doktor falsafah.

Sehubungan itu, kurikulum Permata Insan dibina merangkumi empat aspek utama iaitu al-Quran dan as-sunnah, bahasa Inggeris,



**SEBAHAGIAN** pelajar yang hadir pada pelancaran Program Permata Insan USIM di USIM Nilai, baru-baru ini.

Arab dan pembangunan insan yang merangkumi pembangunan sahsiah, emosi, kreativiti, ICT, mental aritmetik, pemikiran kritis dan penyelesaian masalah.

Hasil kerjasama dengan Universiti King Abdul Aziz di Jeddah, Arab Saudi, kurikulum yang digunakan ini mendapat pengiktirafan

antarabangsa.

Kerjasama ini juga dapat mendedahkan para pelajar dengan pengalaman pembelajaran di luar negara, lawatan ke institusi-institusi ilmu, penyertaan ke persidangan dan bengkel, program pertukaran pelajar antarabangsa dan sebagainya.